

Заңға бағыну – біздің міндетіміз

Былыр қабылданған ҚР «Кәсіптік одақтар туралы» жаңа Заңына сәйкес еркін кәсіподақ ұйымдарының біріктірілуі басталған болатын. Биыл сәуір айында болған Қазақстандық энергетика салалық кәсіподағының VII съезінде осы мәселеге қатысты жұмыс қорытындысы қаралып, салалық кәсіподақтың құрамына енген еркін ұйымдардың саны нақтыланып, жаңа төраға сайланды. Біз Энергетика салалық кәсіподағының тізгінін алған Оразбек Бекбаспен, аталған ұйым ҚР Кәсіподақтар Федерациясының XXIV съезіне қандай жетістіктермен келіп отыр, қандай жұмыстар атқарылуда деген мәселелер төңірегінде әңгімелескен едік.




– Оразбек Телібайұлы, жаңа қызметіңіз құтты болсын! Сіз басқарып отырған ұйым еліміздегі ірі кәсіподақтардың қатарынан. Еркін ұйымдардың бір «тудың» астына бірігуі туралы не айтар едіңіз? Қазір сіз тізгіндеген кәсіподаққа қанша адам мүше?

– Рахмет, «Бірлік түбі – бөреке» деген аталы сөз бар қазақта. Тарыдай шашырап жатқанша, таудай болып бір тудың астына біріккен дұрыс деп санаймын. Одан ұтпасақ, ұтылмасмыз анық. Заң бір күн емес, біраз уақыт қаралып, әбден пісіп-жетіліп барып, қабылданды ғой. Егер заңда біріккен дұрыс деп шешім шығарылса, оған біздің алып-қосарымыз жоқ. Негізі осы заңның қабылдануы үшін ұсыныстарды кәсіподақ ұйымдары мен мүшелері өздері ұсынды емес пе?! Сондықтан мұны барша кәсіподақ мүшелері дұрыс қабылдайды деп ойлаймын. Заңға бағыну – міндетіміз, заңды құрметтеу – парызымыз. Ал, біздің кәсіподаққа мүше адамдар санына келсек, олардың қатары 31 мыңнан 40 мыңға дейін жетті.

– Жаңа қызметіңіз Сізге үлкен жауапкершілік жүктейтінін біле тұрып, батыл қадамға бардыңыз. Міне, бір айдай уақыт өтті. Қызығынан қиындығы көп қызметке келгеніңізге өкінбейсіз бе? Жалпы, кәсіподаққа қалай келдіңіз?

– Бұл сұрағыңызға «Көз қорқақ қол батыр» деген мәтелді алға тартар едім. Менің ұстанымым, тек қана алға басу, адамдарға титтей де болса да қолғабыс жасау. Сондықтан мен қандай жұмыстан да қашпаймын, мейлі оның жауапкершілігі түн ұйымды төрт бөлуді қажет етсе де. 2013 жылы мен «Самұрық-энерго» ұлттық компаниясының қызметкері болып жүргенімде, өз ішімізден кәсіподақ құруға ұсыныс айтылды.

Үлкен мекеме болған соң, еңбек дауы туындамай тұрмайтыны хақ. Ал, әрбір еңбек адамы заңнамаға сәйкес қорғалуға құқылы. Аталған мақсатты жүзеге асыру үшін компанияның басшыларымен кеңесе келе, осыдан екі жыл бұрын «Энергетиктер кәсіподағы федерациясы» ҚБ құрдық. Бұған дейін кәсіподақ ұйымы компанияның өзге филиалдарында бар болатын. Бірақ, біз барлық әрекетімізді тек заңға сүйене отырып жасадық. Сөйтіп, заңдық тұрғыдан сауатты кеңестер, бағыт-бағдар беретін іргелі ұйым болып қалыптастық. 16 бастауыш ұйымнан тұратын



18 мың адам мүшелік өткен кәсіподаққа қол жеткіздік. Ал, өткен жылы «Кәсіптік одақтар туралы» ҚР Заңы күшіне енді. Осы кезде, «Самұрық-энерго» АҚ-ның жанындағы «Энергетиктер кәсіподағы федерациясы» ҚБ таратылып, мекемедегі 140 қызметкермен Қазақстандық энергетика салалық кәсіподағының

қатарына бірінші болып ендік. Артынша бастауыш ұйымдар салалық кәсіподақ құрамына кіре бастады. Сәуір айында өткен салалық кәсіподақтың кезекті съезінде 25 жылға жуық саланың тыныс-тіршілігіне өтене араласып келген төраға Ахмет Қалиев және өзге де кәсіподақ белсенділері Қазақстандық энергетика салалық кәсіподағына мені жаңа төраға етіп ұсынды. Қатысушы делегаттар өз тараптарынан мені қолдап, бірауыздан сайлады. Енді мен көпшілік сенімін ақтау үшін аянбай еңбектенуге тырысудамын.

– Сонда қазір энергетикаға қатысты еркін ұйымдар бір салалық кәсіподақ құрамына толықтай кіріп болды ма? Салалық кәсіподақтың бүгінгі жағдайы, жұмысы туралы не айтасыз? Қандай өзгерістер бар?

– Жоқ, біздің салада әлі күнге өз алдына еркін кәсіподақ ұйымы болып жүргендер жеткілікті. Менің төраға болып қызметке кіріскенімде бірінші болып қолға алғаным, республика бойынша энергетиктердің қанша еркін бастауыш кәсіподақ ұйымы бар екендігін анықтау болды. Олардың саны айтарлықтай екен.

Бүгінде 13 ұйымға ағымдағы жылдың шілде айына дейін салалық кәсіподақтың мүшесі болуын ескертетін құжат жібердік. Екінші мәселе, бүгінге дейін біздің салалық кәсіподақтың бас ғимараты Алматы қаласында орналасқан еді. Барлық жиын, келіссөз, съездер Елордамызда өтетіндіктен мекемені осында көшірдік. Осы арада, «Самұрық-Энерго» АҚ басқарма төрағасы Алмасадан Сатқалиевке айтар алғысымыз зор. Ол екі жыл бұрын кәсіподақ ұйымын құрамыз деген бастаманы қолдаған адамдардың бірі болатын. Біз салалық кәсіподақтың құрамына енген кезде де, қолдау білдіріп, мекемені Елордаға көшіргенде де қол ұшын берді. Үшінші мәселе, еңбек адамының құқығын заңдық тұрғыда қорғайтын құжат – ол ұжымдық келісім шарт. Болған

өзгерістерге орай саладағы қолданыстағы ұжымдық келісім шарттарды қарап, оларды бірегейлендіру қажет деген шешім шығардық. Бір бастауыш ұйымда келісім шарт тармақтары көп болса, екінші жерде бағыты мен бабы аз ғана бір жақты ыңғайландырылған. Жұмыс бөрушінің де жұмыс жасаушының да

көңілінен шығатындай, ең бастысы заңды толық сақтайтын біркелкі ұжымдық шарт алдағы уақытта жасалынатын болады. Сондай-ақ, қазіргі заман талабына орай, салалық кәсіподақтың атқарып отырған жұмысы, жаңалықтары көпшілікке қолжетімді болу үшін жеке сайтымызды аштық. Барлық облысты осылайша ақпараттандыруды жөн көрдік. Ал, алдағы уақыттағы жоспарлар реті салауатты өмір салты мен спортты насихаттау, ұжымдық байланысты күшейту мақсатында түрлі спартакиадалық ойындар, мерекелік іс-шаралар атқару.

– Оразбек Телібайұлы, санаулы күннен соң ҚР Кәсіподақтар Федерациясының XXIV съезі өтеді. Сондай-ақ, кәсіподаққа биыл 110 жыл толып отыр. Федерация жұмысын қалай бағалайсыз және съезде қозғалатын мәселелер туралы не айтар едіңіз?

– Биыл мерейлі жыл. ҚР Кәсіподақтар Федерациясының XXIV съезі 110 жылдықпен тұспа-тұс келіп отыр. Федерацияның Қазақстан азаматтары үшін, соның ішінде қай саланың болмасын, еңбек адамдары үшін атқарып жатқан жұмысы телегей-теңіз, рөлі аса маңызды. Елбасының өзі кәсіподақ жұмысына сенім білдіріп, қолдау көрсетуі Федерациядан бастап оның құрамына кіретін салалық барлық кәсіподақтарға артылған үлкен сенім, жоғары баға болса керек. Алдағы съезге келетін болсам, оның жұмысына біздің кәсіподақтан 10 делегат қатысады. Кәсіподақтар Федерациясы съезде көп мәселені көтермекші. Ең басты үш резолюциямен танысып шықтық. Бәрі де орынды, шешімін табуы қажет ететін күрделі мәселелер. Олар съезге қатысушылар тарапынан қолдау табады деген сенімдемін. Сөз орайы келгенде, баршамызға ортақ 110 жылдық мерекемен Әбілғазы Қалиақпарұлы бастаған ұжымды, барлық саланың кәсіподақ ұйымдары мен олардың мүшелерін құттықтап, еңбектеріне табыс тілеймін.

– Өңгімеңізге рахмет!

Ақсер СЕГІЗБАЙ